

इवनिंग डोगरी न्यूज़ बुलेटिन

समे 18:15 Hrs

<><><><><><>

Headlines

1. कश्मीर घाटी दे नौगाम पुलस थाने च दुर्घटनावश होए दे धमाके च 9 दी मौत 32 जखमी।
2. उपराज्यपाल मनोज सिंहा ते मुख्मन्त्री उमर अब्दुल्ला होरें इस घटना च कीमती जानी नुक्सान पर गैहरा दुख प्रगट कीता।
3. कठुआ च दोआइयें ते कृषि दे क्षेत्र च ए.आई. आधारित काहडे बारे त्रै-रोजा सम्मेलन ते कार्जशाला सम्पन्न।
4. जम्मू-कश्मीर खेडु परिषद आसेया अज्ज चिरे राती मिड-नाईट मैराथॉन दे त्रीए संस्करण दा सरिस्ता कीता जा रदा ऐ।
5. ते समूलचें राष्ट्र च अज्ज जनजातीय गौरव दिवस दे मौके पर मुल्खै दे विकास च जनजातीय समुदाय दे महत्वपूर्ण योगदान गी उजागर कीता जा रदा ऐ।

<><><><><><>

DGP/Jt. Secy- PC

जंदी चिरें रातीं कश्मीर घाटी दे नौगाम पुलस थाने च दुर्घटनावश होए दे इक जबरदस्त धमाके च 9 लोकें दी जान चली गई ऐ। एह जानकारी अज्ज जम्मू-कश्मीर दे पुलस महानिदेशक नलिन प्रभात होरें इस हादसे बारे मीडिया गी तफसील पेश करदे होई दिती। उनें दस्सेया जे मारे गेदे लोकें च प्रदेश जांच एजेंसी SIA दा इक कर्मी- फोरेंसिक साईंस लैब्राट्री टीम दे त्रै कर्मी- 2 क्राइम सीन फोटोग्राफर- मैहकमा माल दे दंड अधिकारी- जेहडे इस जांच च मैजिस्ट्रेट टीम दा हिस्सा हे ते टीम च शामिल इक दर्जी दी बी इस हादसे च जान चली गई ऐ। घायलें च 27 पुलसकर्मी- मैहकमा माले दे 2 अधिकारी ते कन्नै लग्गदे इलाके दे त्रै बसनीक शामिल ना।

तोंआई नमीं दिल्ली च इस घटना दे बारे च मीडिया गी जानकारी दिंदे होई केन्द्री गृह विभाग दे जायंट सैक्रेटरी प्रशांत लोखांडे होरें आखेया जे सरकार मंदे-भागे आहली इस घटना च जान मुहाने आहलें दे परोआरें कन्नै हमदर्दी कन्नै खड़ोती दी ऐ.....

<><><><><><>

LG /CM Grief

उपराज्यपाल मनोज सिन्हा ते मुखमंत्रि उमर अब्दुल्ला होरें नौगाम पुलस थाने अंदर होए दे धमाके पर गैहरा दुख प्रगट कीता ऐ। एल.जी होरें इक सनेह च मारे गेदे लोकें दे परोआरें कन्नै हमदर्दी प्रगट करदे होई घायलें दे तौले नरोए होने दी कामना कीती ऐ। एल.जी होरें दुर्घटनावश होए दे इस हादसे दे पिच्छे दे कारणें दा पता लाने लेई जांच दा बी हुकम जारी कीता ऐ। मगरा उपराज्यपाल होरें इस हादसे च अपनी जान मुहाने आहलें पुलसकर्मियें – मैहकमा माल दे अधिकारियें ते इक आम नागरिके दे शवें पर पुष्प चक्र चाढ़दे होई उनेंगी श्रद्धांजलि भेंट कीती। तोंआई मुखमंत्रि उमर अब्दुल्ला होरें इस घटना पर गैहरा दुख बुझदे होई- इस हादसे च जान मुआहने आहलें दे परोआरें- मित्रें- -रिश्तेदारें कन्नै दुख ते हमदर्दी प्रगट कीती ऐ।

<><><><><><>

LoP Terrorism

जम्मू-कश्मीर विधानसभा च विपक्ष दे नेता सुनील शर्मा होरें आखेया ऐ जे श्रीनगर दे नौगाम पुलस थाने च होए दा धमाका- असेंगी आतंकवाद दा मकाबला करदे होई सुरक्षाबलें दे सामने लगातार बनी दियें चुनौतियें दा बी चेता नोआंदा ऐ। उनें जम्मू-कश्मीर दे लोकें दी सुरक्षा ते इत्थै रमानदारी ब्हाल करने दे केन्द्र सरकार दे धेइए गी फ्ही पक्का कीता ते आखेया जे सरकार आतंकवाद गी दना बर्दाश्त नेई करने दी अपनी नीति पर म्हेशा कायम रौहग ते इंदा पूरी तगड़ेयाई कन्नै मुकाबला कीता जाहग। उनें आखेया जे पूरे खित्ते च सुरक्षत म्हौल जकीनी बनाने लेई आतंकवाद रोधी कारवाइयें-खूफिया एजेंसियें बश्कार तालमेल ते सुरक्षा ढांचे च होर बेहतरी आंदी जाहग। सुनील शर्मा होरें अगगे आखेया.....

<><><><><><>

Workshop- AI -D2A

गाट्टी कठुआ दे औद्योगिक बाओटेक पार्क दे बीराक-बायोनेस्ट इनक्यूबेटर च आयोजित त्रै-रोजा सम्मेलन ते कार्जशाला अज्ज सम्पन्न होई गई- जेडी दोआइयें ते राई-बाई दे क्षेत्र च आर्टिफीशल इन्टेलीजेन्स आधारित नमियें काहडें दे बारे च ही। इस कार्जशाला दा सरिस्ता सी.एस.आई.आर. –ट्रिपल आई.एम जम्मू-सी.एस.आई.आर जिज्ञासा ते बीराक बाओनेस्ट इनक्यूबेटर आसेया सांझे तौरा पर कीता गेदा हा- जेहदे च मुख्य भरै थमां शोधकर्ता-विद्यार्थी ते माहिर शामिल होए। केन्द्री विज्ञान ते टैक्रॉलोजी मंत्री डाक्टर जितेन्द्र सिंह होरें इस आयोजन लेई जारी अपने इक विशेष वीडियो संदेश च आखेया जे कठुआ च इस चाल्ली दी कार्जशाला ते सम्मेलन दा सरिस्ता कीता जाना अपने-आपै च बड़ा महत्वपूर्ण ऐ- कीजे इस जिले कन्नै हिमाचल-प्रदेश ते पंजाब राज्य बी लग्गदे न ते इत्थे होने आहली कुसै बी गतिविधि दा असर ते फैयदा इनें गोआंडी राज्यें गी बी मिली सकदा ऐ। उनें मुलखै दे 14 बक्ख-बक्ख संस्थानें थमां 75 युवा शोधकर्ताएं दे हिस्सा लैने पर खुशी ते संदोख प्रगट कीता। उनें आखेया जे इस आयोजन कन्नै घट्टो-घट्ट 20 मकामी विद्यार्थियें गी शोध अनुसंधान दे क्षेत्र बारे महत्वपूर्ण जानकारी हासल होई ऐ।

<><><><><><>

Midnight Marathon

फिटनेस ते लोकें दी खरी मती भागीदारी गी बदाने दे धेइये कन्नै जम्मू-कश्मीर खेल परिषद रियल-टाइम स्पोर्ट्स,COROS ते मोनालिज़ा कन्नै रलियै जम्मू मिडनाईट मैराथॉन दे त्रिए संस्करण दा आयोजन अज्ज रातीं करने जा रदा ऐ। आकाशवाणी जम्मू संवाददाता नै जानकारी दिती ऐ जे इस मैराथॉन च हर स्तर दे धावकें गी ध्यानै च रखदे होई दौड़ दी बक्ख-बक्ख श्रेणियां रक्खी गेइयां न। एदे च पेशेवर खडारियें दे इलावा फिटनैस गी लेइयै जागरुक लोक बी हिस्सा लै रदे न। इस मैराथॉन दी शुरुआत मौलाना आज़ाद स्टेडियम थमा होग ते शहर दे मुख-मुख रस्ते बक्खी बदोग। 42 किलोमीटर ते 21 किलोमीटर दी दौड़ गी अज्ज रातीं साड्डे 11 बजे झंडी दस्सियै शुरु किता जाग- जदके 10 किलोमीटर ते 5 किलोमीटर दी दौड़ां कल बडुलै मूहन्हेरे 5 बजे शुरु होग।

<><><><><><>

Prog Announcement

आकाशवाणी जम्मू दा क्षेत्रीय समाचार एकांश 'राष्ट्री प्रेस दिवस' दे मौके पर औंदी 16 नवम्बर गी 25एं मिटनें दी इक विशेष परिचर्चा प्रसारित करने जा'रदा ऐ जेहदा विषे ऐ लोकतंत्र च प्रेस दी भूमिका। कल तारें दपैहरी 12 बजे प्रसारित होने आहले इस बशेश कार्यक्रम च स्हाड़े परौहने होडन जम्मू-कश्मीर दे वरिष्ठ पत्रकार ते डेली तस्कीन अखबार दे एडिटर इन चीफ सोहेल काजमी जेहड़े इस विशे पर अपने माहिराना बचार सांझे करडन। इन्दे कन्नै गल्लबात करडन स्हाड़े न्यूज एंकर जगमोहन शर्मा। एहू कार्यक्रम तुस स्हाड़े इसै चैनल पर मीडियम वेव 303 मीटर यानि 990 किलोहर्टज ते एफ.एम 100 इशारिया 3 मैगाहर्टज पर सुनी सकदे ओ।

<><><><><><>

Janjatiya Gaurav Divas

अज्ज राष्ट्र स्वतंत्रता सेनानी ते जनजातीय नेता भगवान बिरसा मुंडा हुंदी जयंति दे मौके पर जनजातीय गौरव दिवस मना रदा ऐ। सरकार नै जनजातीय इतिहास गी जिंदा रखने दी महत्वता गी समझदे होई 15 नवम्बर गी जनजातीय गौरव दिवस घोषित किता हा। समय दे कन्नै एदा विस्तार जनजातीय गौरव सप्ताह तोड़ी होई गया ऐ। इस सप्ताह दे तैहत भारत दे हर राज्य च सांस्कृतिक कार्यक्रम- प्रदर्शनियां ते शैक्षणिक गतिविधियां आयोजित कीतियां गेइयां- जेदा मकसद जनजातीय इतिहास दी जानकारी सांझा करना हा। जनजातीय गौरव दिवस दे मौके Govt. Boys Higher Secondary School मंडी च बी इक कार्यक्रम दा आयोजन कीता गया। कार्यक्रम दा शुभारम्भ स्कूल दे Senior Lecturer हारुण राठौड हुंदे स्वागत सम्बोधन कन्नै होई। उनें इस मौके दस्सेया जे आजादी दी लड़ाई ते राष्ट्र निर्माण च जनजाती समुदाय दे योगदान दे सम्मान च 15 नवम्बर गी जनजातीय गौरव दिवस मनाया जंदा ऐ। भगवान बिरसा मुंडा होरें गी पुष्पांजलि भेंट करदे होई स्कूल दे प्रिंसिपल –अनवर खान होरें आखेया.....

<><><><><><>

Artificial Limb Camp

इक नेक पैहल दे तैहत- भारती सेना नै Pritam Spiritual Foundation कन्नै रलियै पुंछ च शारीरिक तौरा पर विकलांगें आस्तै मुफ्त कृत्रिम अंग नाप ते फिटिंग शिविर दा आयोजन कीता- जेड़ा अज्ज सम्पन्न होई गया। इस शिविर दे आयोजन दा मकसद जरूरतमंदें गी बेहतर गुणवत्ता दे कृत्रिम अंग उपलब्ध कराना हा- जेदे कन्नै उन्दा जीन सौकखा होई सकै। समापन दे मौके कमांडर- 93 Infantry Brigade –सचेन्द्र जोशी होर मुख परौहने हे। अपने सम्बोधन च जोशी होरें Pritam Spiritual Foundation ते भारती सेना दी इस काबिले तारीफ पैहल आस्तै प्रशंसा कीती।

<><><><><><>